

國史讀本

五卷

國

史

江苏工业学院图书馆

藏 书 章

讀

本

光緒三十四年六月十五日印行



著 者

咸 陽 李 岳 瑞

印 刷 所

上海西門外梅林山路順元里
廣智書局活版部

發 行 所

上海四馬路
廣智書局

分 售 處

各 省 大 書 莊

定價大洋二角五分

(國史讀本卷五全一冊)

國史讀本卷五目錄

- 唐一百一祿山叛命之始 一百二祿山據河北 一百三東京之陷 一百四顏杲卿兄弟起兵討賊 一百五續 一百六郭李之初起 一百七嘉山之戰 一百八潼關之陷 一百九續潼關之陷及玄宗幸蜀 一百十太子留守討賊 一百十一肅宗卽位於靈武 一百十二長安之陷 一百十三祿山之死 一百十四太原之捷 一百十五張巡守雍丘 一百十六張巡守睢陽 一百十七續 一百十八收復兩京 一百十九續 一百二十史思明來降再叛 一百二十一安史之復合 一百二十二九節度相州之潰 一百二十三季光弼河陽之戰 一百二十四續 一百二十五續 一百二十六邙山之敗及史思明死 一百二十七再復東都 一百二十八史朝義之伏誅 一百二十九張后及李輔國之亂政 一

- 百三十續 一百三十一僕固懷恩之叛 一百三十二吐蕃陷長安 一
 百三十三僕固懷恩之敗 一百三十四郭子儀單騎盟回紇 一百三十五
 續 一百三十六元載籌邊之策 一百三十七魚朝恩亂政始末 一百
 三十八楊炎兩稅之制 一百三十九劉晏畧傳 一百四十續 一百四
 十一續 一百四十二綜紀代宗時政 一百四十三李光弼之晚節 一
 百四十四郭子儀之晚節 一百四十五盧杞亂政 一百四十六諸鎮連兵
 拒命 一百四十七李惟岳之平 一百四十八朱滔王武俊之叛 一百
 四十九軍興聚斂之政策 一百五十顏真卿之忠節 一百五十一陸贄直
 諫之始 一百五十二涇原亂兵犯關 一百五十三段秀實之死節 一
 百五十四奉天之危急 一百五十五興元收元下詔罪已 一百五十六李
 懷光之再亂 一百五十七李晟勤王之績 一百五十八續 一百五十
 九李晟收復京師 一百六十李懷光之平 一百六十一河北兵事稍定

盟	一百六十二貞元弊政	一百六十三李晟之被讒	一百六十四吐蕃却
陸贄相業	一百六十五李泌相業	一百六十六李泌外交之策	一百六十七
	一百六十八續	一百六十九王叔文之獄	一百七十續
吐突承璀之僨師	一百七十一憲宗之討劉闢	一百七十二王承宗之拒命	一百七十三
	附譚忠縱橫之策	一百七十四魏博歸命	一百七十五蔡
州吳元濟之反	一百七十六裴度之相	一百七十七李愬平蔡之功	
	一百七十八續	一百七十九平李師道	一百八十憲宗晚年之驕侈
續	一百八十一憲宗暴崩之疑案	一百八十二唐之再失河北	一百八十三
	一百八十四續	一百八十五劉蕡對策直言	一百八十六李德裕
鎮蜀之功	一百八十七宋申錫之獄	一百八十八李訓鄭注之進用	
	一百八十九甘露之變	一百九十續	一百九十一文宗晚年受制宦寺之
苦	一百九十二杜牧之論時事	一百九十三武宗之英斷	一百九十

四回鶻之平回鶻即回紇憲宗時改名

一百九十五續

一九十六李德裕籌邊


之策 一百九十七昭義之叛

一百九十八續

一百九十九續

二

百續



國史讀本卷五

咸陽李岳瑞編

唐一百一 祿山叛命之始

安祿山專制三道。陰畜異志。殆將十年。以上春秋高。且待之厚。欲俟上晏駕。然後作亂。會楊國忠與祿山不協。屢言其必反。爲上書策請除祿山。同平章事。召令赴闕。而以賈循爲范陽。呂知誨爲平盧。楊光翽爲河東。則勢分而後患除矣。上卒不聽。國忠因欲促祿山速反。以驗其言。祿山知之。反謀始亟。其黨亦勸令速發。嚴莊高尙爲之謀。主張通儒。孫孝哲。史思明爲之腹心。田承嗣。蔡希德。崔乾祐。尹子奇之徒皆其爪牙。猛將也。尙頗工詞翰。方李林甫媚疾。專政文學。寒峻之士皆無路自進。尙旣困不得志。常歎曰。高尙當舉大事而死。豈能齧草根求活耶。遂薄遊河朔。祿山引置幕府。專典箋奏。莊才幹通敏。能治繁劇。祿山尤倚任之。天寶十三載。祿山自京師歸范陽。

遂不復入朝。而請用蕃將代漢將。至三十有二人。左相韋見素力持不可。上竟從祿山之請。中官用事者。悉受祿山賂。盛言祿山竭誠奉國。上益不疑。會祿山之子成昏於京師。上手詔召之觀禮。祿山辭不至。而表請獻馬三千匹。以蕃將二十二人部送之。執鞍之蕃兵。每匹又二人。河南尹達奚珣力言不可。許上始稍悟。有疑祿山之意。乃遣中使馮神威齎手詔諭祿山。却其進馬。而召令十月朝華清宮。神威至范陽宣旨。祿山踞牀微起。竟不拜。但問聖人安穩而已。唐之臣子例呼天子爲聖人神威還泣白曰。幾不得復見大家。於是朝野灼然知祿山之必反矣。

唐一百二 祿山據河北

祿山反。謀既決。獨與嚴莊高尙。日夕密計。將佐皆莫之知。獨怪其數月以來。屢享將士秣馬厲兵而已。天寶十四載十一月。祿山發所部兵。及同羅奚契丹室韋。凡十五萬衆。反於范陽。命副將賈循留守。諸將皆引兵夜發。祿山出薊城南。大閱誓衆。以討楊國忠爲名。長驅而南。步騎精銳。煙塵千里。鼓譟震地。時海內承平久。百姓累世不

識兵革。猝聞范陽兵起。遠近震駭。河北本祿山統內。所過州縣。望風瓦解。守令或開門出迎。或棄城竄匿。或被禽被戮。無能拒之者。祿山先期遣人詣太原。却副留守楊光翽以去。太原官吏奏狀上。猶謂惡祿山者之譖言也。數日乃知其定反。然後召宰相謀之。國忠揚揚有得色。曰。今反者止祿山耳。將士皆不欲也。不過旬日。必傳首詣京師矣。上以爲然。會封常清入朝。上召見。問方畧。常清大言曰。臣請走馬詣東京。開府庫募驍勇。折馬箠渡河。計日取逆胡之首。獻之闕下。上悅。以常清爲范陽平盧節度。常清卽日乘驛赴洛陽。募兵得六萬人。斷河陽橋爲守備。上又以皇子榮王琬爲元帥。高仙芝副之。統諸軍東征。出內府錢帛募兵十一萬。號曰天武軍。旬日而集。皆京師市井無賴也。仙芝出關屯於陝郡。祿山至靈昌津。以緹約敗船及草木橫絕河。流朔風嚴寒。一夕冰合如砥。乘之以渡。步騎散漫。人莫知其數。所過殘滅。上下詔親征。旣而不果。

唐一百三 東京之陷

祿山既陷滎陽。西趨洛邑。封常清所募兵皆白徒。未更訓練。屯武牢以拒賊。賊以鐵騎蹂之。官軍大敗。常清收餘衆。戰於葵園。再戰於上東門。皆敗。東京遂陷。達奚珣降於賊。留守李愷。謂御史中丞盧奕曰。吾曹荷國重任。雖知力不敵。必死之。愷收殘兵拒戰。皆棄愷潰去。愷獨坐府中。與弈俱。被執。死之。常清西走陝。謂高仙芝曰。常清連日血戰。賊鋒銳不可當。今潼關尙無守兵。賊若豕突入關。京師危矣。陝不可守。不如先據潼關。以拒之。仙芝乃帥兵西去。賊追者已至。官軍狼狽走。無復部伍。士馬騰踐死者甚衆。至潼關。脩完守具。賊至。不得入而還。河南郡縣皆沒於賊。於時朝廷徵兵。諸道皆未至。畿內恟懼。會祿山方謀稱帝。留東都不進。故朝廷得爲之備。援兵亦稍集。仙芝之東征也。監軍邊令誠數以事干之。仙芝多不從。令誠入奏事。具言仙芝常清撓敗之狀。且誣以盜減糧賜。上大怒。遣令誠齎敕。卽軍中斬二帥。常清臨死。草遺表曰。臣死之後。望陛下勿輕此賊。時朝議皆謂祿山狂悖。不日授首。故常清言之。河西隴右節度使哥舒翰。方養痾京師。上藉其威名。且素與祿山不協。召見。拜兵馬副

元帥。翰以疾固辭。不許。命將新舊兵。共二十萬。軍於潼關。翰病。不能治事。使副將王思禮。主騎。李承光。主步。二人爭長。不相統壹。翰用法嚴急。而不恤士卒。諸軍皆懈弛。無鬥志。蓋不待國忠之促戰。識者已早知其必敗矣。

唐一百四 顏杲卿兄弟起兵討賊

祿山之至常山也。太守顏杲卿力不能拒。與長史袁履謙往迎之。祿山喜。賜以金紫。質其子弟。使仍守常山。又使李欽湊將兵守井陘口。杲卿歸途中。指其衣謂履謙曰。何爲著此。履謙喻其意。乃合謀起兵討賊。真卿者。杲卿之弟也。爲平原太守。知祿山必反。因霖雨完城浚壕。料丁壯實倉廩。祿山以其書生也。易之。及寇起。河北郡縣皆風靡。獨平原堅守不下。上聞而歎曰。朕不識真卿作何狀。乃能如此。真卿使親將密懷文牒。潛說諸郡。諸郡多應者。乃召募勇士得萬餘人。諭以討賊之義。繼以涕泣。士皆感憤。河北諸郡聞真卿起義。皆聚衆誅僞官以應之。共推真卿爲盟主。杲卿將起兵與真卿往來密計。欲連兵斷賊歸路以緩其西入之謀。乃僞稱祿山命召李欽湊。

至。則以妓樂酒食犒之。并其黨皆大醉。乃斷欽湊首。收其兵仗。於是大河以北。翕然反。正者凡十七郡。義兵合二十餘萬。杲卿使其客馬燧說賈循曰。祿山負恩悖逆。雖克東都。終歸夷滅。公若誅諸將之不順命者。以范陽歸國。傾其巢穴。此不世之功也。循然之。猶豫未及發。麾下洩其謀。祿山使人誘循殺之。燧逃入西山。隱者徐遇匿之。得免。杲卿起兵。纔八日。城守未及完。而賊將史思明。蔡希德已至。杲卿晝夜拒戰。食盡矢竭。竟被陷。執送洛陽。見祿山大罵不屈。祿山怒。并履謙縛諸柱而磔之。血肉狼藉。猶罵不絕口。顏氏一門死於賊刃者三十餘人。

唐一百五 續

眞卿之起兵也。清河人李萼者。年甫弱冠。爲郡人乞師於眞卿曰。公首倡大義。河北諸郡倚公爲長城。清河公之西隣。國家承平時。江淮河內錢帛皆儲於此。謂之北庫。財足以三平原之富。兵足以倍平原之強。公誠資以士卒。撫而有之。以二郡爲腹心。則餘郡如四支。無不隨公所使矣。眞卿奇之。欲與以兵。衆以爲萼年少輕慮。徒分兵

力決無所成。眞卿不得已辭之。夢就館。復爲書說眞卿曰。清河去逆效順。奉粟帛糧械以資軍。公乃疑而不納。清河不能孤立。必有所繫。屬將爲公西面之強敵。能無悔乎。眞卿大驚。遽以兵六千人授之。送至境握手與別。夢曰。朝廷遣程千里以精兵十萬出崞口討賊。賊據險拒之。不得前。今當先擊魏郡。魏郡既下。使爲西南主人。然後分兵崞口。出千里之師。因討汲鄴以北。及幽燕郡縣之未下者。清河平原帥諸同盟合兵十萬分軍循河制其北走之路。計王師東討者不下二十萬。義兵西向者亦不下十萬。公但表朝廷堅壁勿戰。不逾旬月。賊必有內潰。相圖之變矣。眞卿曰善。乃出兵會清河博平軍。軍於堂邑西南。賊帥遣其將以二萬人拒戰。三郡兵力戰竟日大破之。遂克魏郡。軍聲大震。旣而北海太守賀蘭進明以兵來會。眞卿陳兵迎之。相揖哭於馬上。哀動行伍。進明屯軍平原城南。休養士馬。眞卿每事咨之。由是兵權稍移於進明矣。

唐一百六 郭李之初起

祿山之亂。唐幾失天下。奏再造之勛者。郭子儀。李光弼也。子儀華州鄭人。長七尺二寸。以武舉異等。備宿衛。數建邊功。祿山之叛。爲朔方節度使。率本軍東討。光弼本契丹種人。隸營州柳城。父楷洛。率衆歸朝。禦吐蕃有功。卒於師。光弼嚴毅沈果。有大略。幼善騎射。初從王忠嗣。忠嗣奇之。常曰。它日得我兵者。光弼也。安思順鎮朔方。愛其材。欲以女妻之。光弼不顧而去。與子儀同僚。不相能。及子儀帥朔方。光弼懼不免。自縛詣堂下。請曰。死罪。不敢辭。願卹其老母。子儀下。自解其縛。延與并坐。曰。逆胡犯順。神州陸沈。此乾坤何等時。吾二人尙脩私怨。耶。埽平天下。共獎王室。非異人任也。已有表荐公於朝矣。吾子勛之行相與共功名耳。因執手泣下。歔歔不能止。尋有詔以光弼爲河東節度使。時顏杲卿戰歿河北郡縣再陷於賊。光弼以朔方軍五千東救常山。常山子弟執賊將安思義獻於軍門。光弼釋其縛。問以計。思義曰。吾軍遠行疲勞。猝逢大敵。恐不可支。不如歛兵入守。胡騎雖銳。不能持重。苟求戰。不得氣沮。心離。乃可圖也。光弼曰。善。乃據城以待。明日思明以二萬騎傳城下。光弼發勁弩五百射。

之。賊遂巡稍退。光弼乃出城。與賊夾滹沱而軍。思明雖數困。然恃近援。方解鞍休。士是日饒陽賊五千已至九門。光弼諜知之。提輕兵歛旂鼓。伺賊方飯。出不意盡殲之。思明懼。遂引兵去。光弼與子儀會於井陘。

唐一百七 嘉山之戰

郭子儀、李光弼大敗史思明於九門。還至常山。思明收散卒數萬踵其後。子儀選驍騎更番出戰。三日至行唐。賊疲乃退。官軍乘之。又敗諸沙河。祿山復使步騎五萬人北就思明。又使蔡希德、牛廷珣發范陽兵助之。合七萬餘人。而蕃兵居五之一。子儀至恆陽。思明亦至。子儀深溝高壘以待之。賊來則守。去則追之。晝則耀兵。夜斫其營。賊不得休息。數日子儀、光弼相與謀曰。可以戰矣。於是督僕固懷恩、渾釋之諸將與賊軍戰於嘉山。賊軍大敗。斬首四萬級。捕獲千餘人。思明墜馬露髻。跣足奔走。至暮杖折槍歸。營奔於博陵。光弼就圍之。於是河北十餘郡皆殺賊守將。來降。漁陽路再絕。賊往來者皆輕騎竊過。多爲官軍所獲。將士家在幽州者無不搖心。祿山大懼。召

嚴莊高尙詬之曰。汝數年來教我反。以爲可萬全。今潼關距守。數月不能進。北路又絕。諸軍四合。吾所有者。止汴鄭數州而已。萬全何在。汝自今勿復見我矣。尙莊懼。數日不敢見祿山。時祿山已僭帝號。國號大燕矣。會田乾真自關下來。說祿山曰。自古帝王經營大業。皆有勝有敗。豈能一蹴而成。四方援軍雖集。然半皆新募烏合。未更行陳。安能敵薊門精銳之師。尙莊有佐命勛。未可棄也。祿山悅。復召尙莊入見。待之如初。祿山議棄東都。走歸范陽。計未決。李光弼表稱。祿山在洛陽。幽州空虛。當進軍直擣范陽。傾其根本。使賊退無所歸。必成禽矣。會潼關失守。子儀。光弼急迴軍西入關。

唐一百八 潼關之陷

是時天下以楊國忠驕縱召亂。莫不切齒。哥舒翰之行也。裨將王思禮說翰以抗表請誅國忠。翰恇怯弗敢從。思禮又請將三十騎劫取國忠。主潼關誅之。翰曰。若此。是翰反。非祿山反矣。或說國忠。今朝廷重兵盡在翰手。一旦援旂西指。於公豈不危哉。